

Վ. Բ. ԲԱՐԵՈՒԴԱՐՅԱՆ

ՆՈՐ ՆԱԽԻՋԵՎԱՆԻ ԳԱՂՈՒԹԸ 1853—1856 ԹԹ. ՂՐԻՄԻ
ՊԱՏԵՐԱԶՄԻ ՏԱՐԻՆԵՐԻՆ

Ռուսահայ գաղութները, մասնավորապես նրանցից առավել բազմամարդու նշանակալից օջախները, ապրել են հասարակական-քաղաքական միանգամայն ուրույն կյանքով: Նրանք հայ համայնքի համեստ շրջանակներում լծորդել են երկու ժողովուրդների՝ հայ և ռուս ժողովուրդների փոխհարաբերություններն ու կապերը, աշխուժորեն արձագանքել ու մասնակցել են ռուսական հասարակական կյանքի բոլոր գլխավոր իրադարձություններին: Մյուս կողմից, ռուսահայ զանգվածները կտրված ու անտարբեր չեն եղել իրենց ժողովրդի բախտի, նրա պատմական ճակատագրի հանդեպ: Ուրիշ խոսքով, հայկական զանգվածները դրսևորել են ռուսական տիրապետության ներքո ապրելու ու նրա մի մասնիկը կազմելու, սակայն միաժամանակ հայկական գաղթօջախ լինելու իրենց ուրույն գոյավիճակը:

Սույն հոդվածում խոսվելու է ռուսահայ խոշորագույն գաղութներից Նոր Նախիջևանի¹ հասարակական-քաղաքական հարուստ կյանքի դրվագներից մեկի՝ անցյալ դարի կեսերի Ղրիմի պատերազմին Դոնի հայկական զանգվածի մասնակցության մասին:

Ինչպես հայնտի է, մի կողմից Թուրքիայի ու նրա հետ դաշնակցած անգլոֆրանսիական բանակների և մյուս կողմից՝ ռուսական զորքերի միջև պատերազմական գործողությունների հիմնական թատերաբեմ դարձան Ղրիմի թերակղզին ու սևծովյան առափնյա շրջանները:

Ռուսական զորքերի համառ ու հերոսական դիմադրության շնորհիվ երկարաձգվող պատերազմում հույժ կարևորություն էր ստանում զորքին ռազմամթերք հասցնելը և պարենով ապահովելը, մանավանդ, երբ նկատի ենք առնում երկաթուղիների բացակայության պայմաններում տրանսպորտի այն ժամանակվա դժվարությունները:

¹ Հայ ժողովրդի XVIII դ. վերջերի և XIX դ. պատմության մեջ նշանակալից դեր է կատարել Նոր Նախիջևանի գաղութը, որը հիմնվել է Եկատերինա 2-րդի 1779 թ. նոյեմբերի 14-ի հրովարտակի հիման վրա, Ղրիմի հայաբնակ վայրերից կազմակերպված գաղթի հետևանքով:

Կայսերական շնորհագրով ղրիմահայերը, հաստատվելով Դոնի ափերին, տնտեսական մի շարք առանձնաշնորհումներից զատ ստացան ազգային որենքներով ու ավանդական սովորություններով դատ ու դատաստան վարելու, կրոնական դավանանքը պահպանելու, սեփական եկեղեցիներ կառուցելու, էջմիածնի մայր աթոռի իրավասությանը ենթարկվելու իրավունք, և առանձին հայկական մագիստրատ ու ներքին կառավարչություն ունենալու ինքնավարություն:

Մեզ հետաքրքրող ժամանակաշրջանում Դոնի հայկական գաղութը՝ Նոր Նախիջևան քաղաքը իր հայկական հինգ գյուղերով, որպես վարչական առանձին միավոր՝ Նոր Նախիջևան կամ Նայկական օկրուգ անվանումով, Տազանրոգի և Մարիուպոլի օկրուգների հետ մտնում էր փաստորեն նահանգի իրավասություններից օգտվող, Տազանրոգի քաղաքապետության (градоначальство) կազմի մեջ:

Դոնի ավազանում խաչաձևվում էին Ռուսաստանի կենտրոնական շրջաններից, Ղրիմից, Ուկրաինայից, Նախակովկասից եկող ցամաքային ձանապարհները: Դոն գետը իր վտակներով միացնում էր մերձագոլյան ու սևծովյան շրջանները Ուրալի ու հեռավոր Սիբիրի և կենտրոնական նահանգները՝ Սև ծովի, հետևաբար նաև եվրոպական ու ասիական երկրների հետ:

Այսպիսով, Ազովի ու Դոնի ավազանը, գտնվելով ցամաքային ու ծովային ձանապարհների հանգույցում, սեփական արտադրանքով և ներքին ու արտաքին առևտրով խոշոր դեր էր կատարում Ռուսաստանի տնտեսության մեջ: Նա միաժամանակ ռազմա-ստրատեգիական առաջնակարգ նշանակություն ուներ. պատերազմի ընթացքում, սևծովյան և կովկասյան բանակին պարենամթերք ու ռազմական հանդերձանք մատակարարելու խոշոր բազա էր հանդիսանում և այդ առումով էլ կովոդ կողմերի համար կարևոր նշանակություն ստանում²:

Առաջատար դեր էր կատարում մասնավորապես Ռոստովը, ուր կենտրոնացված էին պարենամթերքի ամենախոշոր պահեստները: Պաշարեղենից բացի այնտեղից բանակին մատակարարվում էր ռազմական հանդերձանք՝ ռումբեր, փայտյա տներ, դեղորայք և այլն: Ռոստովի շուրջունածովյան գործարանը Սևաստոպոլի պաշտպանության համար սկսել էր արտադրել նաև հրանոթներ:

Մերձագոլյան շրջանը, այդ թվում և նոր Նախիջևանը, հեծելազորին ձիեր էր մատակարարում: Ռոստովն ու Նախիջևանը միաժամանակ նախադուռ էին հանդիսանում Կովկասի համար: Այլ խոսքով, Ղրիմի պատերազմի ժամանակ մերձագոլյան շրջանի դերը մեծ էր թե՛ տնտեսական և թե՛ ռազմական տեսակետից:

Պատերազմ հայտարարելուց որոշ ժամանակ անց եկատերինոսլավի նահանգը, Տագանրոգի քաղաքապետությունը հայտարարվում են ռազմական դրության մեջ:

Նոր Նախիջևանի գաղութը սահմանամաս լինելով պատերազմի դաշտին և ըմբռնելով ստեղծված նոր իրադրությունը, անմիջապես արձագանքում, սիրահոծար կամքով նկատելի օգնություն ու աջակցություն է կազմակերպում, և այդպիսով գործոն մասնակցություն ունենում պատերազմին:

Ռազմական գործողություններ ծավալելու հենց առաջին ամիսներին՝ 1854 թ. հունվարի 20-ին հայկական գյուղերը, քաղաքապետի Մանուկ Ալաջալովի նախագահությամբ հավաքվելով ժողովի, բանակին օգնելու պատրաստակամություն են հայտնում և դրամական նվիրատվություն կատարում: Տեղի կառավարիչների՝ Ատամանի և Ժերերի միջոցով Թուֆտի գյուղը տրամադրում է 300 արծաթ ռուբլի⁴, Զալթր, Սուլթան-Սալա, Սալա և Նեսվիտա գյուղերը միասին՝ 1700 արծաթ ռուբլի⁵, Հայ գյուղացիների հավաքին մասնակցելու հաջորդ օրը, Ալաջալովը բարձրաստիճան պետական պաշտոնյաներին հայտնում է, թե հինգ հայկական գյուղերը ռուս-թուրքական պատերազմի առիթով լցված

² См. А. Г. Коломойцев, Оборона Приазовья во время Крымской войны (1853—1856 гг.). Ростов н/Д, 1953 (рукопись), стр. 43—45.

³ Сборник известий относящихся до настоящей войны (1853—56 гг.), издаваемый Н. Путиловым, кн. 13, СПб, 1855, стр. 5.

⁴ Հայկական ՈՍՀ կենտրոնական պետական պատմության արխիվ (այսուհետև ՀԿՊՊԱ), ֆ. 139, գ. 269, թ. 27.

⁵ Նույն տեղում, թ. 29.

են կառավարությանը նվիրվածության ղգացմունքով և բանակի կարիքների համար նվիրաբերել են 2000 ռուբլի գումար⁶։

1854 թ. մարտի 10-ի գրությամբ Տագանրոգի քաղաքապետը Նախիջևանի մագիստրատին հայտնում է Դոնի ղորքերի հրամանատար, ատաման, գեներալ-լեյտենանտ Խոմուտովի հրամանը՝ բոլոր հնարավոր միջոցները ձեռք առնել թշնամու ներխուժման դեպքում⁷։ Այս շրջապատի ռազմական դրությանը ծանոթացնելու նպատակով հայտնում է, որ Դոն գետից մինչև Թամանի Թերակղզին ամուր պաշտպանական գիծ է ստեղծվել՝ Դոնի կաղակային շորս գեղերի ուժերով։ Հրամանում նշված են պաշտպանության առանձին տեղամասերը և դրանք պահպանող ղորախմբերի անունները⁸։

Մագիստրատը հանգամանորեն քննարկում է ստացված հրամանը իրագործելու խնդիրը։ Նա պահանջում է բնակչության մարտունակ մասից՝ կազմակերպված և աշակերտ լինել, կազմ ու պատրաստ պահել ձիերը և փոխադրություն կատարելու ունակ մյուս տրանսպորտը։ Թշնամու հարձակման մասին որևէ լուր իմանալու դեպքում անմիջապես հայտնել և այլ միջոցառումներ։ Նշանակվում են երկու հեղինակավոր անձնավորություն՝ քաղաքում կայալուրը, իսկ գյուղերում՝ Խոջաևը մագիստրատի սույն ձեռնարկումների կատարմանը վերահսկելու համար⁹։

Պատերազմի պայմաններում ղորքի պարենավորման մեջ գլխավորը հացով ապահովելն էր։ Ընդամին, ուղորական եղանակով թխված հացը մի բանի օրում փշանում էր, ուստի այն փոխարինվում էր պաքսիմատով, որի պատրաստումը, սակայն, դժվար էր ու մեծ հոգս էր պահանջում։ Հիմնական սննդով՝ հացով բանակի մատակարարմանն օգնելու ցանկությամբ Նախիջևանում քաղաքագլխի գլխավորությամբ ստեղծվում է պաքսիմատ թխելու հատուկ հանձնաժողով։ Հանձնաժողովը պատերազմի ողջ ընթացքում եռանդուն աշխատանք է տանում և բնակչության ուշադիր վերաբերմունքի շնորհիվ մեծ հաջողության հասնում։ Բավական է ասել, որ հայ համայնքը 1854—56 թթ. իր միջոցներից պատրաստում է հսկայական քանակի՝ 10500 փութ պաքսիմատ և նվիրում բանակին։ Ամբողջ հայ գաղութի միջոցներով կատարվող նվիրաբերություններից բացի, նման հայրենասիրական վերաբերմունք էին դրսևորում նաև առանձին քաղաքացիներ, որոնք նվիրաբերեցին 2800 շետվերտ ալյուր, իսկ պետական ալյուրից թխեցին 500 փութ պաքսիմատ¹⁰։ Վաճառական Կ. Հայրապետյանն իր սեփական միջոցներով 500 շետ. պաքսիմատ է պատրաստում ու նվիրում բանակին¹¹, իսկ Ա. Խալիբյանը 10000 փութ անտրացիտ՝ սեծովյան նավատորմին¹²։

Նախիջևանցիների հայրենանվեր աշխատանքներն այնքան ակնբախ էին, որ չէին վրիպում կառավարության տեսադաշտից, և պետական բարձրագույն մարմինները հանձնաժողովի նախագահի անունով բաղմիցս շնորհակալություն են հայտնում «կառավարական առաջադրանքը կատարելիս ցուցաբերած օրի-

6 ՀԿՊՊԱ, ֆ. 139, գ. 374, թ. 2։

7 ՀԿՊՊԱ, ֆ. 139, գ. 91, թ. 3։

8 Նույն տեղում, թ. 8։

9 Նույն տեղում, թ. 5—6։

10 ՀԿՊՊԱ, ֆ. 139, գ. 85, գործ 91, թ. 19—20։

11 ՀԿՊՊԱ, ֆ. 139, գ. 91, թ. 20։

12 ՀՍՍՀ գրականության և արվեստի թանգարանի արխիվ, Խալիբյանի ֆոնդ։

նակելի ջանքերի համար»¹³։ Կայսրն իմանալով հայ հասարակության գովելի արարքը՝ 10000 փութ պաքսիմատ կուլկասյան կորպուսի զորքերին նվիրաբերելու մասին, պաշտոնական շնորհակալություն է հայտնում¹⁴։

Այդ տարիներին խիստ կրճատվել էր Ազովի և Սև ծովերով կատարվող արտաքին առևտուրը։ Հայ վաճառականներն իրենց առևտրական գործունեությունը հարմարեցրել էին պատերազմական պայմաններին։ Նրանք հիմնականում զբաղվում էին բանակին ալյուր և ուրիշ պարենամթերք մատակարարելով։

Պատերազմի շրջանում առաջնահերթ խնդիր էր նաև հանդերձանքի ու պարենի տեղափոխությունը ռազմաճակատային գիծ։ Կարգավորված ճանապարհների բացակայության պայմաններում, մասնավորապես ձմռանն ու գարնան աննպաստ եղանակներին, զորքին ժամանակին պաշար հասցնելու համար լուրջ վտանգ էր ստեղծվում։

Այստեղ ևս հայ հասարակությունը հայրենանվեր վերաբերմունք է դրսևորում և տրանսպորտի իր միջոցներով նկատելի աջակցություն կազմակերպում առաջ շարժվող զորամասերին։ 1854 թ. փետրվարին Նախիջևանի և Սուլթան-Սալայի բնակիչները 18-րդ հետիոտն դիվիզիային սիրալիր ընդունելով կամովին հատկացնում են տրանսպորտի միջոցներ։ Առանց դրա, սաստիկ ձմռան օրերին զորքի անցումը դժվարություններով ու դանդաղ կընթանար։ Դիվիզիայի հրամանատարը հայ բնակիչների «այդքան գովելի զգացմունքի ու գործողությունների մասին» հայտնում է ռազմական մինիստրին¹⁵։ Վերջինս տեղեկացնում է, որ այդ ամենի համար նիկոլայ 1-ինը իր կայսերական բարեհաճությունն է հայտնել¹⁶։

Տագանրոգ ուղարկելու համար հայ բնակիչներն իրենց միջոցներով Ռոստովից չորս ժանրաբարձ հրանոթ են տեղափոխում¹⁷։ Նախիջևանի բնակիչները նկատելի աջակցություն են ցույց տալիս 1854 թ. Սևաստոպոլ զորք տեղափոխող պետական պաշտոնյային¹⁸։

Հայ գյուղացիները երեք հարյուր սայլերով ձմռանը պաքսիմատ են տեղափոխում Տագանրոգից Մարիուպոլ, այնտեղից էլ Կերչ ու Ենիկալե¹⁹։ Հինգ հայկական գյուղերի ներկայացուցիչները 1855 թ. հունվարին հավաքվում են Նոր Նախիջևանում և պաքսիմատ պատրաստելու հանձնաժողովի անդամների մասնակցությամբ քննարկում Տագանրոգի ռազմական նահանգապետի գրությունը։ Վերջինս հայտնում էր, որ Ղրիմի գործող բռնակին պարեն հասցնելու նպատակով հարկավոր է Ռոստովի պետական պահեստներից 150 չետվերտ պաքսիմատ Պերեկոպ տեղափոխել։ Հայ գյուղական հասարակությունը միակամ պատրաստակամություն է հայտնում «ներկա ռազմական պայմաններում աջակցել կառավարության նպատակներին ու կարիքներին»²⁰։

13 ՀԿՊՊԱ, ֆ. 139, գ. 91, թ. 379։

14 ՀԿՊՊԱ, ֆ. 139, գ. 81, թ. 10։

15 ՀԿՊՊԱ, ֆ. 139, գ. 81, թ. 4։

16 Նույն տեղում, թ. 5։

17 ՀԿՊՊԱ, ֆ. 139, 1810, թ. 379։

18 ՀԿՊՊԱ, ֆ. 139, գ. 82։

19 ՀԿՊՊԱ, ֆ. 139, գ. 1810, թ. 379։

20 ՀԿՊՊԱ, ֆ. 139, գ. 68, թ. 42։

Ընդամին հարկ է նկատել, որ բոլոր փոխադրումները և ռազմական նպատակներով իրականացվող ուրիշ աշխատանքներ հայերը կատարում էին ձրի՝ դորքին աջակցելու հայրենասիրական մղումով:

Հայ համայնքը գրվատելի վերաբերմունք է դրսևորել ռազմաճակատ մեկնող զորամասերի աուջրնթացին նպաստելու, նրանց ընդունելու և նանապարհելու խնդրում:

Նոր Նախիջևանի օկրուգի սահմաններով անցնող զորամասերին հայերը սրտսուռ ընդունել, հաճախ օթևան ևն հատկացրել, պարեն մատակարարել և անգամ օժանդակել ճանապարհային դժվարությունները հաղթահարելուն:

17-րդ հետիոտն դիվիզիայի 4 և 5-րդ մարտկոցները և առաջին գումարտակը իրենց գոհունակությունն են հայտնել ժողովրդի ընդունելության, իսկ սպայական կազմը՝ նաև լավագույն սննդով հյուրասիրելու համար՝ Նախիջևանով անցնելու ժամանակ²¹:

Տագանրոգի զինվորական նահանգապետը և քաղաքացիական բաժինը շրնորհակալություն են հայտնել Նախիջևանի քաղաքացիներին մոսկովյան հետիոտն գնդի շորս գումարտակ սիրով ընդունելու և 1854 թ. փետրվարի 27-ից մինչև մարտի 17-ը բնակարանով ու պարենով ապահովելու համար²²: Քաղաքի հասարակությունը պատրաստակամություն էր հայտնել պատերազմի ամբողջ շրջանում, առանց վարձի, տեղավորել և սննդով ապահովել երկու հետիոտն և մեկ հեծյալ մարտկոց²³:

Հայ հասարակությունը բազմիցս կայսրի շնորհակալությանն է արժանանում զինվորական գումարտակներին, մասնավորապես սպայական կազմին արժանավայել ընդունելու և բնակարան ու պարեն հատկացնելու համար²⁴:

Թշնամու կռալիցիոն ռազմական ուժերը շնախատեսված համառ դիմադրության հանդիպելով Սևաստոպոլում, վճռեցին քաղաքի հերոս պաշտպաններին ծնկի բերել և առհասարակ ռուսական բանակի դիմադրությունը վերջնականապես ընկճել նրան պարենավորումից զրկելու միջոցով: Այդ նպատակով 1855 թ. գարնանից ձեռնարկեցին Ազովի ծովը մտնելու և մերձազովյան շրջանում գտնվող հիմնական ռազմա-պարենային բազաներն ու շտեմարանները ոչնչացնելու ռազմարշավին: Թշնամու նավատորմի մուտքը արգելակել հնարավոր էր Կերչի նեղուցը անանցանելի դարձնելով, իսկ դրա համար անհրաժեշտ էին դրամական միջոցներ: Պահանջվող գումարը լրացնելու ցանկությամբ սահմանամոտ շրջաններում նվիրատվությունների լայն հոսանք է սկսվում: Դոնի հայերը այս անգամ ևս առաջին շարքերում էին, և արժանացան կայսրի ուշադրությանը²⁵: Նախիջևանը նվիրաբերում է 10000 արծաթ ռուբլի, Տագանրոգը՝ 8527 ռուբլի, Մարիուպոլը՝ 2200 ռուբլի, իսկ Ռոստովը՝ 2050 ռուբլի գումար²⁶:

Չնայած բնակչության ջերմ աջակցությանը, պաշտպանությունը թույլ էր: Ցարական ռազմական ղեկավարությունը հույսը դրել էր Կերչի նեղուցի անմատչելիության վրա, որը սխալ ու անհեռատես տակտիկա էր: Թշնամուն հաջողվում

21 ՀԿՊՊԱ, ֆ. 139, գ. 1810, թ. 378.

22 ՀԿՊՊԱ, ֆ. 139, գ. 81, թ. 3.

23 ՀԿՊՊԱ, ֆ. 139, գ. 1810, թ. 379.

24 ՀԿՊՊԱ, ֆ. 139, գ. 81, թ. 32.

25 ՀԿՊՊԱ, ֆ. 139, գ. 81, թ. 11.

26 См. П. П. Филевский, История города Таганрога, Москва, 1898, стр. 161.

է մայիսի 12-ին գրավել Վերչը, մտնել Ազովի ծովը և Եյսկում, Բերդյանսկում, Տազանրոգում ու Մարիուպոլում ոչնչացնել զգալի քանակությամբ պաշար։ Սակայն նրան չի հաջողվում ավելի առաջանալ և գրավել Տազանրոգն ու մյուս առավել կարևոր բազաները։

Թշնամին ձգտում էր մասնավորապես հասնել ռազմա-տնտեսական կարևոր բազա հանդիսացող Ռոստով քաղաքը, զրավել կամ ոչնչացնել այնտեղ կենտրոնացված հացի խոշոր պաշարներն ու հրանոթի պահեստները և դրանով իսկ ծանր դրության մեջ դնել ռուսական բանակը։ Այդ անակնկալ վտանգից ապահով լինելու նպատակով տեղական իշխանություններին հարկադրում են պահեստավորված պարենն ու ռազմական հանդերձանքը տեղափոխել հայկական եկեղեցի և Արփաշինսկի խուտորը²⁷։ Դրանից բացի նախատեսվում է ամրապնդել Տազանրոգի պաշտպանությունը։

Չնայած Ռուսաստանի ռազմա-տեխնիկական հետամնացությանը, պատերազմի ընթացքում ռուսական զորքը ցույց տվեց հերոսության ու խիզախության փայլուն օրինակներ։ Այդ բանն արտահայտվեց նաև ամբողջ մերձազույցյան շրջանում ծավալված ռազմական գործողությունների կարևոր փուլերից մեկը հանդիսացող Տազանրոգի պաշտպանության ժամանակ։ Դոնի կազակային զորքերի և նրան ամեն տեսակ աջակցություն ցույց տվող տեղի բնակչության, ի թիվս որոնց և նախիջևանահայերի ջանքերի շնորհիվ ձախողվեցին թըշնամու պլանները։ Նրան հաջողվեց գրավել Տազանրոգը, թափանցել Դոնի մատույցները, հասնել Ռոստով ու խափանել նաև Կովկասի հետ հաղորդակցության կարճ ճանապարհը²⁸։

Գետերի ու ճահճուտների վրայով զորքի անցումն ապահովելու համար հարմարանքներ ստեղծելու վրա աշխատում էին նախիջևանի օկրուգի 2879 հայ գյուղացիներ։ Նրանք, դրանից բացի, Դոնի մատույցների պաշտպանությունը կազմակերպելու նպատակով նվիրաբերել էին 2012 ռուբլի։ Ռոստովի և նախիջևանի բնակիչները Դոնի նավահանգիստը ամրացնելու համար հավաքել էին 7750 ռ. գումար²⁹։

Ղրիմի պատերազմի ժամանակ շոշափելի էր նաև հայ գաղութի աջակցությունը վիրավորներին և առաջին հերթին Սև ծովի առափնյա ռազմական բերդերը պայթեցնելու և թշնամուն հանձնելու հետևանքով անօթևան մնացած զինվորների ընտանիքներին բնակարան և սննդամթերք տրամադրելու, և կամ նրանց օգտին նվիրատվություններ կատարելու գործում։

Տակավին 1854 թ. ապրիլին փոխ-ծովակալ Լ. Սերերրյակովը Տազանրոգի քաղաքապետ Ն. Վ. Ադլերբերգին հայտնում է ունեցվածքից ու օթևանից զրկված զինվորական հրամանատարության ու պաշտոնյաների ընտանիքները մինչև պատերազմի վերջը պահելու անհրաժեշտության մասին³⁰։ Տազանրոգի քաղաքապետը Մ. Ալաջալովին հաղորդելով ստացված լուրը ավելացնում է. «նախիջևանի բնակիչները արդեն ապացույցել են իրենց նվիրվածությունը կայսրին և հայրենիքին, այդ պատճառով էլ ես ներկա դեպքում ինձ իրավունք չեմ վերապահում կասկածել նրանց պատրաստակամության վրա»³¹։

27 Государственный архив Ростовской области, ф. 344, оп. 1, д. 605, л. 154.

28 См. А. Коломойцев, Оборона Приазовья во время Крымской войны, стр. 214.

29 Նույն տեղում, էջ 153.

30 ՀՀՊՊԱ, ֆ. 139, 1824, թ. 3, 5.

31 Նույն տեղում, թ. 2, 6.

Ն. Աղելբերգը չէր սխալվում: Շուտով Նոր Նախիջևանի քաղաքացիները «առաջնորդվելով մարդասիրական զգացմունքներով» մինչև պատերազմի վերջը տասնհինգ բնակարան են առանձնացնում զինվորականների ընտանիքներին տրամադրելու, ինչպես նաև հավաստիացնում տալիս նրանց սննդամթերքը ապահովելու մասին³²: Հայ հասարակությունը 5000 ո. է տրամադրում Սևաստոպոլի կայազորի վիրավոր զինվորներին խնամելու³³, և 4549 ո.՝ Սևաստոպոլում տուժած ընտանիքների օգտին³⁴: Նախիջևանի ուսումնարանի շենքը հասարակության վճիռով դատարկվել էր ու հատկացվել պետությանը, և տեղի բնակիչների օգնությամբ վերածվել զինվորական հիվանդանոցի, իսկ ուսումնարանի համար ընդհանուր միջոցներով վարձվել ուրիշ շենք³⁵:

Թշնամու նավատորմը Կերչ մտնելու հետևանքով բազմաթիվ հույն ընտանիքներ մնացել էին միանգամայն անօթևան ու անօգնական: Նրանց այնքան սիրալիր ընդունելություն են ցույց տալիս հայերը, որ «Կերչից և Ենիկալեից դուրս եկած այդ քաղաքացիների խնդրանքով Դոնի զորքերի ատաման գեն-լեյտենանտ Խոմուտովը հայտնում է պարոն ռազմական մինիստրին՝ Ալաջալուլի և Նախիջևանի բնակիչների ցուցաբերած ջերմության մասին»³⁶: Ալեքսանդր 2-րդ կայսրը «շնորհակալություն է հայտնում Դոնի Նախիջևանի քաղաքի բնակիչներին իրենց հայրենանվեր և մարդասիրական զգացմունքի համար ու քաղաքը պարգևատրում «Ջանասիրության համար» ոսկե մեդալով և վաղիմիրյան ժապավենով»³⁷:

Այսպիսով, Նոր Նախիջևանի գաղութը Ղրիմի պատերազմի ժամանակ յուր համեստ կարողությունների սահմաններում շխնայեց իր միջոցները և բազմակողմանի օգնություն ցույց տվեց ռուսական բանակին: Թշնամու առաջխաղացումը կանխելու ձգտումով համակված հայ հասարակությունը դրամական միջոցներ ու պարենամթերք նվիրաբերեց, տրանսպորտի իր միջոցներով զորքի ու ռազմական հանգերձանքի տեղափոխությանը նպաստեց: Նա վիրավորներին ու ռազմական գործողությունների հետևանքով անտուն ու անվաստակ մնացած քաղաքացիներին ընդունելու և ապաստարան հատկացնելու և Դոնի մատուցյցները ամրապնդելու աշխատանքներին անձամբ մասնակցելու միջոցով արտահայտեց հայրենասիրական իր վերաբերմունքը:

Հայկական գաղութի տնտեսությունը մեծապես հարմարվել էր պատերազմի պայմաններին ու նրա պահանջներին: Կրճատվել էր առևտուրը, մանավանդ արտաքին: Ծովափնյա ու գետափնյա քաղաքների թշնամու նավատորմի անընդհատ ուժակոծումներից ահաբեկված Նախիջևանի շատ բնակիչներ թողել էին իրենց տները և տեղափոխվել հայկական գյուղերը: Ինչ խոսք, նման պարագաներում, պատերազմի ավարտը մեծ խանդավառություն էր առաջացնելու բնակչության մեջ: Նախիջևանցիներին հասկանալի նույն գոհունակությունն էր արտահայտում Միքայել Նալբանդյանը, երբ հաշտության օրերին իր հայրենակիցներին ուղղած նամակը ավարտում էր «շնորհավոր լինի խաղաղությունը»³⁸ արտահայտությամբ:

32 Նույն տեղում, գ. 81, թ. 2.

33 Նույն տեղում, գ. 1810, թ. 379.

34 ՀՍՍՀ Մատենադարան, Կաթ. դիվան, թ. 183, վ. 460.

35 ՀԿՊՊԱ, ֆ. 139, դ. 1830, թ. 379.

36 Նույն տեղում, գ. 1810, թ. 380.

37 Նույն տեղում.

38 Երվանդ Շահագիրյան, Դիվան Միքայել Նալբանդյանի, Երևան, 1932, էջ 74.